

tatem munitam quidem & egregiè exstructam, sed hominibus vacuum, nam serpentibus cedere coacti sunt. Ab hoc loco viginti numerantur leucæ ad *Taphium*: hæc est *Taphnes*, de qua in Psalmo: *Fecit prodigia sua in campo Taphneos*, Psalm. LXXVIII. 43. Hæc posita est in *terra Gessen*, de qua in Genesi multa scribuntur Gen. XLV. XLVI. XLVII. L. Fuit olim urbs insignis, sed nostro ævo destructa est. A *Taphni* usque ad *Memphim*, quam nunc *Damiatam* esse putant, quindecim sunt leucæ, distatque duabus à Mari leucis, in ruinis penitus jacens, nisi quod non longè à situ suo villa est exstructa propter naves in ea collocandas, atque merces, colligendas. Abundat is locus æquè ut *Taphnis frumento, fructibus*, & omnibus ferè bonis, quibus homo vesci potest. Derivatur à *Nilo rivus unus* versus *Taphnim*, & hinc versus *Pharmam* fluens, primum versus *Terram Sanctam* constituens portum. Alterum verò portum efficit alius *Nili rivus* priore major, tribus leucis à *Damiata Mare* ingrediens. Tertius portus est in *Alexandria*, ubi, scilicet, major pars *Nili* labitur in *Mare*, distatque à *Pharma*, ubi primus *Nili rivus* *Mare* intrat, centum viginti milliariis: & hæc est *longitudo Egypti juxta Mare*. Ab *Alexandria* verò usque in *Babyloniam* numerantur etiam centum viginti milliaria, ascendendo contra *Nili cursum*. Porro à *Pharma* eundo per *Taphnim* & *Damiatam* centum computantur milliaria usque ad *Babyloniam*, sive *Cayrum*, etiam adversus fluvium navigando. A *Babylonia* verò usque ad *Syenem*, quæ versus *Austrum* ultima est pars *Egypti*, sunt milliaria circiter ducenta quadraginta: & ibi incipit *Æthiopia*, quæ hodiè *Nubia* dicitur: & est tota Christiana, ubi *Beatus Matthæus* prædicasse dicitur. Hujus *Æthiopie* regem captivum vidi in *Babylonia*. Ascendens autem à *Damiata* per *Nili* fluvium veni in *Abdelam*, ac deinde in *Mausotam*, ubi *Nilus* scinditur in duo, volviturque rivus minor ad fretum, quod est juxta *Pharmam*, & ex illo intrat *Mare*. Rursum juxta villam *Semmath* est alia *Nili* scissio, labiturque is abscissus rivus juxta villam, quæ *Phatures* dicitur, in *Mare*: sed non est navigabilis, ut alii jam memorati rivi sunt. Item à *Semmath* ascendendo, priusquam venias ad *Phyton* & *Ramassen*, separatur à *Nilo* quartus rivus, intrans *Mare* juxta villam, quæ *Stermon* appellatur: & ab ea *Nili* divisione usque ad villas *Phyton* & *Ramassen* sunt quinque leucæ, ponuntur hæ villæ altrinsecus in ripa *Nili*. Hinc viginti numerantur milliaria ad locum, qui *Delta* nominatur, ubi scilicet *Nilus*, in duos rivos divisus, totam ferè *Egyptum* facit *Insulam*, in modum Δ literæ triangulariter figuratam, proceditque major aquarum vis ad *Alexandriam*, & minor ad *Damiatam*. A *Delta* usque *Heliopolim* tria numerantur milliaria, ubi & alius rivus à *Nilo* segregatur, & desertur ad civitatem *Pelusi*, & inde fluens per desertum versus *Terram Sanctam* juxta civitatem *Jaris* intrat *Mare*: & hinc ferè duæ sunt diætæ usque ad *Ragazam*, vel *Gazaram* & *Bersabee*. Hic rivus vocatur propriè in *Scriptura* rivus *Egypti*, *Amos* VIII. 8. terminaturque ad ipsam fors tribus *Judæ*. Quidam vocant eum *Binocorulam*, alii *Syron Egypti*: & non est navigabilis. *Heliopolis* est villa opulenta, sed non munita, sicut nec alius quispiam locus per totam *Egyptum* est munitus, præter *Alexandriam* & *Babyloniam*. Hinc septem numerantur leucæ usque ad *Babyloniam*; Hæc civitas est supra modum magna, in littore *Nili* sita, transitque per medium ejus rivus aquarum, à *Nilo* excurrrens, & rursum in eum ruens. A *Babylonia* duabus leucis distant pyramides quædam triangulares & insigniter magnæ. Et hinc duæ sunt leucæ ad *Thebas*, unde fuit *Legio Thebæorum*. Huic quoque adjacet desertum *Thebaidos*, in quo olim fuit magnus numerus *Monachorum*. Et nota, quod à *Babylonia* usque *Syenen* per ducenta & triginta milliaria *Nilus* in nullos dividitur rivus, uno contentus, in quo fluit, alveo. Terra *Egypti* ferè est inaccessible: nam ab Occidente habet *Mare Magnum*, contra *Africam* est desertum *Libyæ* & *Philexorum*: ab Austro est desertum *Æthiopie*, & ab Oriente desertum *Thebaidos* usque ad mare *Rubrum*. Transitus illius deserti est trium dierum, donec veniatur ad locum, qui *Beronice* vocatur: & est portus *Egypti* in littore maris *Rubri* ad *Indiam* ducens. Porro contra *Vulturum* & *Septentrionem* habet *Egyptus* desertum *Magnum* usque ad *Terram Sanctam*, in quo *Filii Israël*, ab *Egypto* fugientes, quadraginta annis morati sunt, *Jos. v. 6*. Floruit ante rem-

Diviso
Nili.

Syene.

Heliopolis.

Thebais.